

Sakshandsamar:
Helle Holte Bruland
56580148

Vår referanse:
Arkivsaknr: 16/1175/ 9

Dykkar referanse:
2014/11042

Hordaland fylkeskommune
Regionalavdelinga

Vår dato
05.05.2017

Uttale til Regional kystsoneplan og Ytre Hardanger - Fusa kommune Rådmannen sitt framlegg til vedtak:

Uttale til regional kystsoneplan for Sunnhordland og Ytre Hardanger vert vedteke slik den ligg føre i saka.

Kommunestyret 27.04.2017:

KOM- 031/2017 Vedtak:

Fusa kommune vedtek uttalen frå utval for plan og miljø med følgjande endringar:

1.1 retningslinjene til planen må punkt 1.3 som motsegnrett takast ut av planen.

2. Punkt 2.16 i retningslinjene må endrast slik: Kommunen har mulighet til å tildela sjøareal til havbruksføremål når dei finn det tenleg utan at det føreligg teknologiske nyvinningar eller at området skal øyremerkast til nye artar.

3. Punkt 3.5 må endrast slik: Fortøyningar kan leggest i areala som er karakterisert som sjø- og vassdrag generelt og slik at framtidig utviding av AK område gjennom kommuneplanvedtak kan gjerast i desse områda.

Utval for plan og miljø 20.04.2017:

Handsaming:

Eit samla utval arbeidde seg gjennom eit høyringsutkast som administrasjonen hadde førebudd til møtet. Utvalet slutta seg samrøystes til framlegget og vil tilrå dette for kommunestyret.

UPM- 036/2017 Vedtak:

Rådmannen sitt framlegg til vedtak:

Uttale til regional kystsoneplan for Sunnhordland og Ytre Hardanger vert vedteke slik den ligg føre i saka.

Uttale til Regional kystsonesplan for Sunnhordland og Ytre Hardanger

Fusa kommune ser store fordelar med at det er utarbeidd ein regional plan for kystsona. Planen vil kunne nyttast som kunnskapsgrunnlag inn i lokale planarbeid, og gjev mykje god og oppdatert informasjon om dei ulike vern- og bruksinteressene. Retningslinene gjev oss eit godt grunnlag for lokal tilpassing og planlegging for sjø og strandområda.

1. Kommenterar til innleiing

Føremålet med den regionale planen er å sikre berekraftig forvaltning av sjøareal og strandsone i Sunnhordlandsregionen og Ytre Hardanger. Fusa ligg opp mot Midthordland, og det er slik sett forståeleg at ikkje heile Bjørnefjorden er med. For forvaltninga av sjøarealet i Bjørnefjorden – og med tanke på kommunesamanslåinga av Os og Fusa fram mot 2020 - meiner vi det likevel ville ha vore gunstig om heile dette fjordsystemet(inkludert sjøarealet i Samnanger) var inkludert i den regionale planen.

Når Fusa no skal arbeide med akvakulturplan for halve fjorden, og i den samanheng har blitt bede om å ta omsyn til heile fjordsystemet under eit, ser ein at ulikskap i kunnskapsgrunnlaget kan verte ei utfordring for utarbeiding av lokal plan. Det er bra at føringer og retningslinjer frå den regionale planen skal utdjupast i kommunale planar. Dette tolkast som rom for lokale tilpassingar.

I prosessen har det vore gjennomført fleire opne møte, og Fusa har delteke på nokre av dei. Det har samstundes vore arbeidd med ein interkommunal strandsoneplan som grunnlag for arbeid med kommunale strandsoneplanar. Det har vore lagt opp til og gjennomført samarbeid og informasjon i arbeidet med kystsonesplanen, men det har likevel vore noko utfordrande å vidareformidle/setja seg inn i virkeområda til dei ulike planane på lokalt nivå. Dette kan ha virka noko begrensande med tanke på lokal medverknad.

2. Kommenterar til hovudmål

Det er bra at ein fokuserer på berekraftig utvikling i sjø og strandsone. Lokalt i Fusa er det eit mål i kommuneplanen om å tilretteleggja fleire gode byggeområde til bustad, fritidsbustad, naustklynger, enkeltnaust og næringsareal i og med nærleik til strandsona, og hovudmålet «berekraftig utvikling» kommuniserer at det skal vera utvikling.

3. Berekraftig kystsonesplanlegging

Det er positivt at føringane gitt i planen skal tilpassast dei lokale tilhøva i kvar kommune med omsyn til arealbruk og lokale, politiske prioriteringar.

Kapittelet gjev mykje god informasjon om dei ulike interessene og ei god beskriving av situasjonen rundt bruk og vern, marint naturgrunnlag, fiskeri, andre bruksinteresser, friluftsliv, landskap og kulturminne. Det er òg gjort ei rekke refleksjonar her som kan vere gode å ha med seg i lokal planlegging. Temakart er informativt.

Positive konsekvensar: Informasjonen i denne tabellen vil vera nyttig som del av kunnskapsgrunnlag for lokal planlegging. Det er òg nyttig at det står at det er trong for td. oppdatert kunnskap kring villfisk og naturgitte tilhøve, låsetjingsplassar og fiskerihamnstruktur, då dette gjer oss merksam på eventuelle lokale utfordringar.

Det er bra at det vert kasta lys over potensielle utfordringar knytt til fleire akvakulturområde og andre tekniske inngrep.

4. Akvakultur

Planen har eit særskilt fokus på akvakultur. Dette er svært positivt for Fusa som er i gang med kommunedelplan for akvakultur. Det er bra at planframlegget gir rom for vekst og kapasitetauke i næringa, og at det er rom for ny teknologi og nye artar. Det er positivt at planen gir rom for lokale tilpassingar, avklaringar og prioriteringar av areala på kommuneplannivå – og vi opplev at planen kan vera eit retningsgjevande verktøy.

Næringa er i endring, og område som tidlegare var i bruk og som ein har gått bort i frå - eller som ikkje har vore eigna til akvakultur tidlegare, kan kanskje vurderast på ny med bruk av nyare teknologi (t.d. lukka anlegg som treng skjerming frå brå sjø).

5. Sjøtransport og maritim næring

Det er ikkje vurdert behov for nye næringsområde i den regionale planen. Fusa kommune har nyleg starta ein prosess for å utvikle eit større næringsareal ved sjø på Samnøy, og har drøfta dette i planforum. Det er i hovudsak tømmerkai som har vore utgangspunktet for nytt næringsareal her, men planprosessen siktar på eit større næringsareal i bakland. Farleia ligg midtfjords i kommunegrensa mot Os, og området er meint å uttransportere tømmer frå store delar av regionen. Dette vil støtte opp under målsetnaden om å flytte meir transport frå veg til sjø, og vil vera i tråd med retningslinjene for sjøtransport og maritim næring.

Det er viktig at farleia i Bjørnefjorden ikkje får begrensningar som konsekvens av ei mogeleg brukryssing som då vil få negativ effekt på det overordna målet om å flytte transport frå veg til sjø.

6. Strandsone

Her finn vi mykje god informasjon og avklarande tema om planarbeid i strandsona. Det er i allmenn interesse at tiltak i strandsona som hovudregel er omfatta av plankrav, men det er og bra at det er gitt opning for mindre utbygging utan plankrav. Dette legg meir ansvar på byggesaksnivå, men gir rom for lokal tilpassing og skjønn.

Det er positivt at det vert oppmoda til at naust kan ha ulik form, fare og materialbruk, og at bustader ikkje skal byggjast innafor område kartlagt som funksjonell strandsona. Dette bidreg til å ivareta strandsona for ålmenta samstundes som det i mange område vil vera mogeleg å byggje nærare sjø. Dette er viktig for Fusa.

7. Retningslinjer

Retningslinene skal nyttast inn i lokal planlegging, og det er positivt at det er rom for lokale tilpassingar. Dei generelle retningslinene er knytt til kapittel 3 og gjeld for alle tema, medan føresegn 2.14 og utover gjeld særskilt arealbruk.

Det vil vera behov for å gje dispensasjonar i ulike tilhøve, sjølv om utvikling som hovudregel bør skje på bakgrunn av ein plan. Det er flott at retningsline 1.5. gjer oss merksamme på at dispensasjonar skal følgje opp mål og retningslinjer i regional plan. Dette skapar ei foventing om kva kommunane vil kunna få til innafør rammene av den regionale planen, sjølv om ikkje alltid lokale planverk er oppdaterte. Retningslinene bidreg til å styrke regional og lokal strandsonopolitikk samstundes som dei gjev god informasjon om korleis ulike bruksinteresser og arealføremål skal handsamast konkret i planlegginga.

8. Handlingsprogram

Handlingsplanen viser oversikt over tiltak som må gjennomførast for å kunne nå måla fastlagt i planen. Mellom anna er det knytt ansvar til kommunane når det gjeld kartlegging av nye næringsområde i sjø og utarbeiding av rettleiar for planlegging i strandsona inkludert metode for funksjonell strandsoner (FS). Fusa kommune har allereie kartlagt FS som del av kommuneplanarbeidet i 2013, og nye næringsområde i sjø vil verte ein del av arbeidet med kommunedelplan for akvakultur. Slik sett ser vi at Fusa kan bidra til å følgje opp nokre av måla.

9. Samla konsekvensar av planforslaget

Det er bra at planen ikkje avdekkjer særskilde nye risikomoment eller fareområde som treng tiltak, og det er gunstig for dei involverte kommunane at planen oppdaterer eksisterande registreringar og samstundes avklarar behovet for ny kunnskap. Det er eit viktig signal til både administrasjon og politikarar på kommunenivå at ein kastar ballen vidare til oss, der vi igjennom lokale planar kan gjerje lokale tilpassingar med bakgrunn i den regionale planen.

Helsing

Helle Holte Bruland
arealplanleggjar

Dokumentet er elektronisk godkjend og har difor ingen signatur.

Vedlegg:

Politisk handsaming - koommunestyrevedtak Fusa
kommune

1352524

05.05.2017

Mottakar:

Hordaland fylkeskommune Regionalavdelinga